

NO. SOALAN : 43

PEMBERITAHUAN PERTANYAAN DEWAN RAKYAT

PERTANYAAN : LISAN

DARIPADA : YB. DATO' DR. NIK MAZIAN BIN NIK MOHAMAD [PASIR PUTEH]

TARIKH : 26 OKTOBER 2016

SOALAN :

YB. Dato' Dr. Nik Mazian bin Nik Mohamad [Pasir Puteh] minta MENTERI PELANCONGAN DAN KEBUDAYAAN menyatakan penjelasan mengenai para pakar pengkaji sejarah yang telah dibayar oleh Kerajaan untuk mengkaji sejarah kedudukan orang-orang Melayu di Malaysia. Berapakah bayaran yang telah dibayar kepada para pakar ini dan apakah hasil penemuan daripada pakar-pakar sejarah ini.

**JAWAPAN : DATO' SERI MOHAMED NAZRI BIN ABDUL AZIZ
MENTERI PELANCONGAN DAN KEBUDAYAAN**

Tuan Yang di-Pertua,

Kementerian Pelancongan dan Kebudayaan secara khusus belum pernah melantik pakar sejarah untuk membuat penyelidikan bagi mengkaji sejarah kedudukan orang-orang Melayu di Malaysia. Walau bagaimanapun, Kementerian ini berpandangan kajian yang paling hampir berkenaan perkara ini adalah kajian yang dilaksanakan oleh Arkib Negara Malaysia iaitu Projek Kajian Penyelidikan Fakta Sejarah Negara. Projek Kajian ini telah dijalankan dari tahun 1994 hingga 2016 dengan kos sebanyak RM80,000. Kajian ini adalah berkenaan Kesultanan Melayu Melaka, Petempatan dan Kerajaan Awal di Tanah Melayu hingga abad ke-19 dan Perlembagaan Persekutuan. Antara hasil penemuan kajian adalah seperti berikut:

(1) Zaman Kesultanan Melayu Melaka

Penduduk tempatan memainkan peranan utama dalam membina kegemilangan Kesultanan Melayu Melaka yang menguasai hampir keseluruhan Kepulauan Melayu dan mempunyai hubungan diplomatik dengan kuasa besar seperti China. Melaka juga menjadi pusat perdagangan antarabangsa dan pelabuhan entrepot iaitu tempat pertemuan pedagang timur dan barat;

(2) **Petempatan dan Kerajaan Awal di Tanah Melayu sehingga abad ke-19**

Petempatan dan kerajaan awal telah wujud di Tanah Melayu sebelum abad ke-14 lagi seperti kerajaan awal yang berasaskan kepada maritim di Johor dan Kedah. Didapati juga telah wujud petempatan dan kerajaan awal sebelum kedatangan pihak luar di Pulau Pinang dan Kuala Lumpur; dan

(3) **Perlembagaan Persekutuan**

Terdapat elemen pemuaafakan dan toleransi dalam Perlembagaan Persekutuan yang menyentuh isu-isu seperti kerakyatan, keistimewaan Melayu, kedudukan Bahasa Melayu, kedudukan institusi Raja dan Agama Islam.

Selain itu, Kementerian ini melalui Perpustakaan Negara Malaysia telah menubuhkan Pusat Kebangsaan Manuskrip Melayu yang merupakan satu bahagian khusus yang berperanan secara tidak langsung untuk menyubur, memasyarakat dan melestarikan kembali perihal berkaitan sejarah, warisan, kebudayaan, cara hidup serta akal budi bangsa Melayu berdasarkan bukti bertulis sebagaimana yang terakam dalam manuskrip Melayu asal tulisan tangan para ilmuwan silam.

Sekian, terima kasih.